

富陽夏氏贊



清光緒中刊民國九
年捐入浙江圖書館

富陽夏氏叢刻總目

悔言六卷

夏震武撰

悔言辨正六卷

夏震武輯

悔言附記

夏鼎武撰

寤言質疑

夏震武撰

衰說考誤

夏震武撰

讀禮私記

夏鼎武撰

詩序辨

夏鼎武撰

庭聞憶略二卷附竹坡先生遺文

寶廷撰

悔言目錄

予取辛巳以前所雜記之編而題之曰悔言紀實也予少而習舉業攻詩文則悔長而泛濫於經史馳騁於申韓黃老則悔旣而稍知從事於聖人之道則又喜陸王厭程朱以靈明爲眞性以虛寂爲至道則悔蓋予至是凡三悔而年已將三十矣自今以往其或得與聞斯道則夫明學術正人心所以繼往聖而俟來哲固有不得辭其責者雖然未敢自信也姑先以此區區者就正於海內同志光

中
金
緒七年辛巳冬十二月辛酉富陽夏震武識

卷之一

學術

卷之二

言行

卷之三

倫常

卷之四

政事

卷之五

聖賢

卷之六

異學

悔言目錄終

悔言卷之一

富陽夏震武伯定

學術類

天下有大任而君相不與焉居天下之廣居立天下之正位行天下之大道爲天地立心爲生民立命爲往聖繼絕學爲萬世開太平建諸天地而不悖質諸鬼神而無疑百世以俟聖人而不惑此天之所命我者身之職也性之分也達不加而窮不損也人無不勝之者患莫肯舉耳大人者能舉之者也舉之者先

立乎其大者而已矣

一日未死則一日之天命民彝賴以立

一日未死則一日有明道覺世之責一日未死則一日有進德修業之功

達而在上則救天下以政窮而在下則救天下以學政以救一時學以救萬世

在上者欲正人心厚風俗必自興學始在下者欲正人心厚風俗必自講學始

君子在上而持正道則小人指以爲朋黨君子在下

而持正學則小人指以爲門戶不宗程朱則已有宗
程朱者必曰是門戶也不闢陸王則已有闢陸王者
必曰是門戶也夫以宗程朱闢陸王爲門戶則孟子
之宗孔子闢楊墨亦將指之爲門戶與自此說興而
世之儒者欲宗程朱則恐人加以門戶之名於是不
顧其理之是非而於程朱謬爲異同欲闢陸王則恐
人斥爲門戶之習於是不顧其學之邪正而於陸王
謬爲附和是故門戶之說其禍必使上無正道下無
正學而後已夫彼小人之惡直醜正欲加之罪誠不

足責獨奈何世之儒者亦惑於其說而不察也吁可怪矣

世之喜陸王而惡程朱者程朱之間學本於實功不若陸王之本心良知可以直任胷臆也世之喜許鄭而惡程朱者程朱之義理歸於躬行不若許鄭之訓詁箋注可以徒憑口耳也

程朱是孔孟大宗子陸王是孔孟冒姓子

漢唐諸儒之得失易見宋明諸儒之得失難知

漢唐之講訓詁趨於俗學者其弊淺宋明之談性理

流爲禪學者其病深

漢儒之學未嘗無可取也但學者當用漢儒不可爲漢儒所用程子朱子是能用漢儒者也漢儒之主人翁也乾嘉諸儒是爲漢所用者也漢儒之奴婢也漢唐諸儒之是非折衷於程朱程朱諸子之是非折衷於孔孟

以程朱爲向導以孔孟爲依歸

嗚呼始倡爲漢學之名以立異於程朱者誰與其始不過出於一二人之勝心私意而其後遂成爲議論

風俗其始不過爲一家之曲學邪說而其後遂貽患於家國天下蓋至今日而其禍烈矣後生小子稍稍讀注疏覽說文得其一二緒論者輒敢訶斥理學鄙薄程朱傲然以漢學自命而不復知有身心性命操守行誼之事鄭元賈逵之說信於四子說文廣雅之書尊於六經嗚呼誰實爲之與吾爲之追原禍首蓋國初毛奇齡之徒已開其端而其時正學昌明道德一風俗同不能以其私說售也及至乾嘉之世惠棟紀昀戴震阮元汪中焦循孫星衍等起噓其餘焰力

與程朱爲難而天下遂靡然從之矣始也詆程朱爲
好名爲門戶爲空疏迂腐猶得列於儒之中幸矣繼
也遂斥爲異端爲釋老爲申韓楊墨而直擯之於儒
之外嗚呼何其甚也自宋以來詆程朱者固有之矣
然其人莫不有奇偉之行卓絕之操足以振俗而式
靡而特以其一時偏見遂成爲賢智之過以取病於
世未有若今之專恃訓詁考據爲能事狂妄自大而
陵蔑儒先者也夫所謂訓詁考據者程朱固亦未嘗
不有事於此然其所以修己治人正人心明學術繼

往聖而詔來哲則固不在此區區之末迹今乃置其
大者遠者一切不講而徒執其區區之末迹以求駕
於儒先之上狂詈醜詆呶呶焉唯恐不足是果何爲
者也彼以程朱之言身心性命操守行誼爲空談則
吾不知與喧爭於文字故實之微聚訟於名物器數
之末一字一義刺刺累幅不已者果孰爲空談耶其
必相與竭力詆斥而擯勿言者則以其說之足妨吾
私而其歸也躬行實踐不足爲存理遏欲不足法惟
恃其訓詁考據營貨利競功名以濟其欲而快其私

苟能博聞強記則雖軼規蕩矩毀棄行檢而無所害
謂之漢學在己旣以此自矜而不復知其餘在世亦
以此相高而不復責其他旣不若程朱之學之拘苦
動爲世忌一言一動之偶失人必羣伺其隙以相詆
而安然可以收名利兼得之效此其術固可謂巧而
特不知彼所推漢學爲篤守孔氏者其道固如是耶
以是而排程朱此與以匪人而妄認一小支以攻大
宗者何以異哉許鄭者孔氏之小支也程朱者孔氏
之大宗也尊許鄭排程朱以趨時好而道術裂矣人

心邪而風氣變禮義絕而廉恥亡盜賊夷狄之禍固
 已日積於當時士大夫之心而不可救又何待於今
 日而始驗與此吾所以追原禍首不得不歎息痛恨
 於乾嘉諸儒而其敗壞天下之罪蓋范武子之論王
 弼何晏罪浮桀紂所謂一世之患輕歷代之害重自
 喪之惡小迷眾之罪大者也雖然世有不以吾言爲
 講學門戶之見者幾希矣悲夫

理者經史之理學者經史之學經學史學卽理學也
 非有二也離經史而講理學者禪學也離理學而講